

Aruba a perde "Un Tronco humano di Cultura" cu morto di Ramon Sharpe

Diadomingo tabata e dia scur pa hopi deportista, teatrista, musico, cantante, miembronan di organizacionnan social y di boluntarianan, despues cu noticia a plama rond di nos isla cu e popular icono, baluarte, person-ahe grandi y mi lo hasta tribi di bisa "genio", Ramon Sharpe", a fayece.


Di tempo mi tabata mucha," Fritzie" manera semper mi a yam'e tabata un sorto di "rolmodel" y pa mi e tempo ey, "tur cos e por haci. Tur cos e sa. E ta mihor cu tur hende den tur cos. Mi tin cu bira manera dje!"

Berdad ta cu mi a trata, pero mi a keda leu di dje. Fritzie tabata e deportista admira. Cricket tabata su linea tempo e ta mucha pasobra su tata tabata gran fanatico y hun-gador di cricket. Cuanto biaha nos no a habri e tapijt di cricket patras di cas pa por dal bala. Y esey pa percura cu nos no ta mishu cu ningun galiña cu e tata tabata cria, y no causa boroto. Pero despues, ata Fritzie ta den e mihornan di atletismo, mi kier a haci mescos, pero nunca mi a yega cerca pasobra mi tabata junior y e tabata adulto veterano caba. Pa musica mi no tabata tin problema pasobra nos tabata djis scucha na cas di Virgil Emanuel e calypsonan y cancionnan grandi di e tempo aya. Su rumannan Leoncio y Hugo tabata esnan mas den musica y canto.

Ta net a escuchador di bon musica aki, a bira un di e mihor compositornan di calypso di nos isla. Mighty Reds, Mighty Whitey, Prince Freddy, entre otro tabata cantantenan cu ta presenta anualmente cu calypso of cu un roamarch, compone pa Ramon Sharpe.

Pa mas di 50 aña e conoci Mighty Sparrow, e Rey di Calypso di mundo. Semper nan a keda masha bon amigo y el a contribui tambe na varios cancion di Sparrow y specialmente esun cu Sparrow a canta algun frase na hulandes, cu ta relaciona cu "e dutch girl". ("Ich how ban jouw, ich hab je liev" manera por scucha e pronunciacion di e hulandes di Sparrow).

Mas o menos 8 pa 9 aña pasa cu Juba Organizacion a busca Sparrow pa bin Aruba, e prome persona cu el a puntra pe tabata Ramon Sharpe y tabata, Whitey, cu tabata mas bien su anfitrión, chauffeur, y tur cos na Aruba. Dos



cantante y compositor grandi di calypso di Aruba cu e Rey di Calypso mundial.

Ramon no tabata tin cancionnan ganador pa por gaba cune awe "cu e tin mayoria di composicion ganador", pero si por bisa cu mayoria di calypso cu contenido cu por a scucha den e competencianan tabata bini for di mente creativo di Ramon Sharpe.

Na aña 2000 Fundarte cu tabata organiza festivalnan di teatro cada tanto aña, a saca un tronco for di costa pariba di Surfside. Cu dolor cu transporte pisa a logra trece esaki dilanti Cas di Cultura pa ceremonia di apertura di festival. Un artista Aleman cu zu Zaag Electrico a crea caranan den e tronco te cu el a bira un obra realmente bunita di arte. Durante e ceremonia aki, sr. Leo Tromp president di Fundarte a conta con a yega asina leu cu e tronco aki ta un pieza di arte, y tambe cu Fundarte den cuadro di Aña di Cultura kier a duna homenahe na local a ser yama "Nos tronco di Cultura".

Pa e ocasion aki a dune un "fluz nobo" como cu solo, awa y bien-to a sute pa 8 aña largo. Tambe a duna su nomber y nomber di esun cu a transforme di un kwihí bieu y mahos, den un obra di arte.

Sr. Ramon Sharpe eyan mes durante e ceremonia a dedica un poesia na e tronco:

*I'm just an ordinary tree trunk
----- Cast aside as a piece of junk
----- With a furnace as my final resting place----- This was to be my eventual fate----- But someone picked me up and with loving heart----- Transformed me into a work of art.*

Esaki a wordo traduci na papiamento:



Un simpel troncon mi ta----- Tira afo manera sushi----- Vlam di candela como mi ultimo lugar di sosiego.-----Esey tabata mi destino.-----Sinembargo un curazon amoroso a piki mi y a transforma mi den un obra di arte.

Riba e foto por mira momento cu Ramon ta duna homenahe na e Tronco di cultura. Esaki ta net dilanti Cas di Cultura y ta bal la pena yega cerca y tira bista riba dje. Hopi ta mire pero nunca a ADMIR'E.

Di creacion por menciona entre otro e su genio di mes ora produci un poesia cortico di 4, 6 of 8 linea. E por ta un caminda y si puntre pa un poesia cortico riba cierto topico, e ta tuma un minuut o mas pa pensa, y eyan mes ta recitabo un poesia, corecto y exacto manera bo a desea. E ta haci esaki riba ki topico cu ta. El a publica tambe e obranan "The Dream" y na papiamento "Ami ta awe".

Ramon a publica obranan den un buki cu a bira internacionalmente conoci y a gana premio internacional na New York. E mes mente creativo aki a hib'e tambe riba tereno di teatro. Ramon a actua den varios obra di Mascaruba y tabata entre e actornan y actriznan di prome fila di e organizacion teatral aki. El a skirbi y dirigi tambe e obra "E lobo blauw", y ademas di esey e obra na ingles "Blight Spirit" (si mi no ta kiboca, e nomber tabata). Den transcurso di añanan el a participa den un of otro forma cu varios di e obranan di Mascaruba.

Riba tereno di deporte, Ramon a destaca den atletismo masha hopi. Coremento, bulamento halto, polstok, atletismo di tereno manera tiramento di jabalina etc. El a hunga baseball y softball entre otro, pero su amor tabata mas pa e deporte di arte martial Judo. E tabata participante den varios torneo internacional di judo pa Aruba y den Weganan Panamericano a destaca masha hopi, mescos cu Toko Tromp y Elio Nicolas, dos di e otro grandinan di e deporte

aki.

Na 1976 el a wordo hasta eligi pa ASU como deportista di aña. Un di e deportenan favorito di dje tabata tambe sambuyamento. El a forma parti den decada 60 y comienzo di decada 70 tambe di e equipo di landadornan cu tabata e asina yama "lifesavernan" di Art Lamour y tabata un sambuyador y tirador di pisca popular. Esaki ainda tempo cu Aruba tabata conoce e periodo di "spearfishing" y tabata conoci internacionalmente y tempo cu Aruba tabata hasta campeon mundial..

Di su genio mi por menciona su habilidad grandi weganan di mesa manera ahedrez y dam, su mente "Einstein" di matematica y trikanan. Su mente di por hipnotiza y nunca a usa esaki pa show, pa gana placa of pa interes. Semper djis como un muestra di ehemplo "e por haci esaki!" E ta usa su "poder" di kita dolor di hende usando "calor di planta di man", duna masahe cu ta efectivo, pero ora ta bin riba asuntoonan si spiritualidad, of historia of cultura, tambe asuntoonan di religion of di biblia, no discuti cune pasobra e ta lagabo leu. Ramon tabata masha inteligente, bon studia, bon lesa y por a papia riba tur cos. Tabata como sifuera e tabata sa tur cos.

Asina multifacetico "Fritzie" tabata. Ken cu sa tur esey di dje y a experiencia tur locual ta para aki riba den su bida, no por keda sin tin admiracion pa e personahe grandi Ramon Sharpe tabata.

Hopi cu a conoce no tabata sa di tur locual e por a haci, e no tabata promove ni propaganda tampoco. E tabata usa su conocimiento mas bien pa educa otronan, y henter su bida e tabata un educador pa tur esnan cu a conoce bon. E nunca a sinta busca popularidad, haci propaganda pa su mes y sigur nunca a gaba su mes, manera masha hopi hende ta haci awe sin cu nan a logra algo pa gaba cune. Ramon tabata un persona humilde y amigo di tur hende cu un sentido di yuda y colabora masha grandi.

Nos lo haya falta di e personahe aki... Aruba a perde un gran mente creativo. Cultura a perde un di su figuranan grandi y deporte sigur a perde un di su astronan di tur tempo. Cu Ramon, "Fritzie" sosega na paz y condolencia na su señora y henter famia grandi.

Juby Naar.